

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 434870 22 St
Tuzla, 01.06.2023. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „OKANO“ d.o.o. za ugostiteljstvo, promet i usluge Tuzla, ul. XVIII H. Brigade 39, nakon provedenog stečajnog postupka, donio je dana 01.06.2023. godine sljedeće:

RJEŠENJE

OTVARA SE stečajni postupak nad imovinom dužnika „OKANO“ d.o.o. za ugostiteljstvo, promet i usluge Tuzla, ul. XVIII H. Brigade 39, matični broj subjekta 1-12106, JIB: 4209342800000, račun broj: 1321000310983075 otvoren kod NLB banka d.d. Sarajevo.

Za stečajnog upravnika imenuje se Almir Bajrić iz Tuzle, ul. Aleja Alije Izetbegovića 3B.

ZAKLJUČUJE SE stečajni postupak nad imovinom dužnika „OKANO“ d.o.o. za ugostiteljstvo, promet i usluge Tuzla, ul. XVIII H. Brigade 39, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 434870 22 St od 12.01.2023. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „OKANO“ d.o.o. za ugostiteljstvo, promet i usluge Tuzla, ul. XVIII H. Brigade 39, a za privremenog stečajnog upravnika imenovan je Almir Bajrić iz Tuzle, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 10.02.2023. godine. Iz izvještaja privremenog stečajnog upravnika proizilazi da je društvo neaktivno preko 15 godina, da na dan pokretanja prethodnog postupka ukupne obaveze iznose 158.382,00 KM a koje se odnose na obaveze po osnovu plaća i naknada i poreza. Transakcijski računi su duže vremena neaktivni i na istima nema sredstava. Društvo nema zaposlenih radnika, osim direktora koji je ostao prijavljen u evidenciji. Društvo nema nepokretnosti u svom vlasništvu, nije pronađena bilo kakva pokretna imovina. Na osnovu podataka dostavljenih od Porezne uprave F BiH KPU Tuzla evidentirane su porezne obaveze po rješenjima o pokretanju postupka prinudne naplate u periodu od 2003 pa do 2022 godine, a koje obaveze nisu izmirene iz čega proizilazi da je stečajni dužnik platežno nesposoban duži vremenski period.

Dakle, privremeni stečajni upravnik nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti, da postoji stečajni razlog za otvaranje stečajni postupka predviđen članom 6 stav 2 i članom 102 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz

kojih bi se mogli podmiriti troškovi stečajnog postupka, sud je rješenjem od 09.03.2023. godine pozvao predlagača, povjerioce i sva zainteresovana lica da u roku od 30 dana od dana objavljivanja poziva u službenim novinama uplate iznos od 3.150,00 KM na ime otvaranja stečajnog postupka, iz kojeg predumjmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 20/23 dana 22.03.2023. godine, oglasnoj tabli suda dana 10.02.2023. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama FBIH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.